

TAMITYA TIMUTEVUJURA CATERA

Pávurubay mǎchuvadani Timutévubay

1 ¹Ray Pávuru, Crístu Jesús nusǎbyi ratidye tǎchunayasara sanchiy, darya savata Jǎdenura riryatidye datyasitye nijyanvay: “Jasintyatera jnyyada Crístu Jesúsnu.” ²Rañuy jiiyyura catera Timutévu, jiryatiy ritay sitenu radyenu ji, jaryi ravyatasi daryaju ji. Ravyata jiiyyura samirya jivyichada Jǎdenu jtedamuju, sajantyutya Jǎdenu samiy variy ji, samirya jivyichadaju jiryorimyu. Titaju jirya ravyata jiiyyu Jǎdenumusiy, Vuyntyityu Crístu Jesúsmusiy jarye.

Ne vuryajada niquejadara samitǎchoda jiryatiy Jǎdenumusirya

³⁻⁴Ray siitye saju Jǎdenu, jiryatiy tariy richiityenyuyada vumyunatyavay sajuntiy, ne radyetyisa nini rayada rajyuuuchaveda jiyada. Ray jita jchanatyani Jǎdenu day, titaju rundamu rajyorácharanumatiy sanijyu. Ne rajechipuy jachipityajajada rajyorádo-damu ji, jnarya, nupora jarye, radyiryuy daryaju yiva, ratidye jchanatyate samiy variy ji. Rajechipityara jiñisija jiryatiy yinayada variy rayadamú. ⁵Rajechipityatanirye, nutyu jichiityenyuyada saju Jǎdenu quivuyasadamu, daryaday nanusiityenyuyada jityeyadabay Nóyidajubentyi, yinodabay jarye, jiryatiy nanitya Évunise. Daryaday ritatye jiñijyu, jiijerye rasiityee saju.

⁶Ramuni rajechipityatanitye ji jiryatiy Jǎdenu jmutyada ji rabeyadanumatirya rajyomutu yinomu. Nutyu riryijchera jintyuruvu jiiday quivedaju, darya yecha Jǎdenu jmutyadamuntiy, jiryatiy sasayada tara ji. ⁷Sasayadate Jǎdenu Yintu vuy, vuryatidye vichasara ne suvuyada jachityavay. Sasay jita vanuyada jachivyeda varivuyy, savatadamuju, vuryatidye jachipiya tara jvaayadaju variy. ⁸Ne yajada tarade niquejada Vuyntyityunchiy, ne yajada raynchintiy jiryatiy tanuvunujovimu ray, jiryatiy rachiitye daryaju saju. Yajmutya jita jiintyirya jiyaruryantiy, paruchariy vichada, jiryatiy ravichada samitǎchoda datyadodamusiy. Jǎdenu say vuvyanutyadaju vuy, vuryatidye jachinityara paruchariy vichada variy. ⁹Niday rayada vuryeyadantiy. Niday natuyada varintyivyuy, vuryatidye siitye vinu saju. Jǎdenu ne jaryetada tara vuryivaayadiva jiiyyu vuy. Sajaryetada jita vuy, jiryatiy suteda yajtotanirya tariy jiejchipyajajada: “Ravichanichara samirya riy.” Nini vichaniryuyada samivyuy sadenunchiy, Crístu Jesúsnychiy; mucadi piruyadajisiy sajachipiyanyuyadara. ¹⁰Sacasiyada dityadoda jidyirya samirya jachipyajajada vuñijyu, sadityadoda Vuyntyityu vuryeyada ráñu Crístu Jesús jtjadamusirya. Nini vuudodara diiyada, samitǎchodamusiy sasipyatada vandamujura jnyyada vuryinyuyadaju,

vuryatidye datya variy: “Ne vanay jarapurya rachasara vuryinuyada variy.” ¹¹Judenu bayada yinsubyiju, samituchoda tuchodaju jasirye, ratidye datyanusara riy rityimyu ne judiyurveda day. ¹²Jirya tuchodanchiy ravyicha paruchariy diye, ne rada riva, radyetyisatya daryajuni Judenu, sajuni rachiitye. Radyetyama samiy: “Ni rabarya samirya jiryatiy rabeyada simura, sitijada rundasaraju.” ¹³Yabay yimura samirya niquejada, jiryatiy jityuvachoda rimusirya, daryani yanique jidchavu varintyidye, Judenumu tuvachodamu, Cristu Jesus vatasadamu jarye. ¹⁴Yajnutya samirya jiryatiy Judenu bayada yimura. Sajmutya jnutyada Judenu Jnutu variy jiirya, nitiy vichasara vuryiva.

¹⁵Jidyetyama samiy jiryatiy rityocheda Asiyamu vichavay titaju ray, riryannumitye variy rajisii. Nanuvichanuyada Ijedu, Ermojetya rityenujuy.

¹⁶⁻¹⁷Sama jantyutyarutya Judenu riy Onesijuru taryi vichiveda, rajuuraju saramityaniy daryajura rayivatyada rivasiy. Sitojadanumatiiy Romamu, ne sadanuyada riva jijeñuyada rimu, tanuvunujovimu. Savatanuyada jaryi rañeço, riva dichadasarajute. ¹⁸Sama jmutya Vuyntyityu yentyutyadamu variñi, variryundamutiy sajti Vuyntyityu. Jiryatiy sivaayadate rajuura taryi vuyyu, Evésumu, tama jidyetyisa jiintyirya.

Samiy jivyatadatate yajvaarya yivaayada

2 ¹Ji radyenu, yavanutya Cristu Jesus jmutyadata ji. ²Jiryatiy jityuvachoda rañique rajuuvay tuvachodajura, raday yajaty datyadoda riy tavay vaduntyi, jiryatiy samirya jachipiyavariy, riryatidye datyanuriy tavay varintyidye.

³Yajachiniy nutyu ray ji, surramu vichadaju, nutyu Cristu Jesus sutaru, samiy sutaru. ⁴Ne sajnuy sutaru nutyityu samiy jiñeço saryityi jitye sutaru taruyyada mityayu. ⁵Daryaday savichasara pedótata tiyisintiy: netimyu ne satiyisa samiy, ne sacanay variy tiyisada murichiryara jatusiiy. ⁶Jaryi nudiy jvaarya jiryatiy sivaachara yindimyu, niñi rajota juryedara yivaaryavasiy vichara. ⁷Yajachipitya samirya jiryatiy ritay yivara, Vuyntyityu jita radatyanujaya samiy titaju variy jiirya.

⁸Yajachipityani Jesucristu jiryatiy samisada jidyijjomusiy. Niñi vichasara Davyibe jasi, jiryatiy suteda Judenu taryi: “Tiqui Davyí jasi racha nutyityu, judiyurveda jiyada rañuju.” Daryani ranicha samiy tuchoda jiryatiy rititara. ⁹Samituchoda datyadodamusiy, ravyichasara paruchariy, ramuni ravyicha tanuvunusintiy, nutyu jvi saraju. Judenu niquejada jita ne tanuvunusara day. ¹⁰Ramuniday rajechinitya titaju riyadajura jiryatiy Judenu jaryetavaryi, riryatidye juryi varirya jantyutyada, jiryatiy Cristu Jesusmura, riryatidye vichajayasara sisa vandamu variy. ¹¹Rani sitenu niquejada jita: “Vutyi dii sisa Cristu, daryaday vuryi jnuchara sisaju varintiy. ¹²Vutyi jachinityara paruchariy vichada sisa, daryaday vuryicha nutyu nutyityurveda variy sisajuntiy. Vuryatiy jtay sayadaju Cristu: Ne radyetyani, daryaday sajty Judenuva vuryeyadajuntiy: Ne radyetya riy.” ¹³Dañunamuy ne vuryajtotanicharara vuñiquejada, ni jita jiryiryi jtotadeda darya jiñiquejada day, ne vanay sanique variy: “Ne riteda darya.”

Sitenu jvaarya

¹⁴Yajachipityajataniiy jirya riy Judenu siityariivay. Vudyetyisatya yinuy Judenu

jnuy vñeçho. Yajtay samiy ruuva: “Ne jiryaniquetta jaryi ranchiy Jüdeni niquejadayu, ne samirya racha variy,” tapi vinu rårupanute riy tuvachuvay.

¹⁵Yajvaay samiy jijeçhiy jachipiyajadata, sajatye Jüdeni variy yiva: “Sítenu jvaarya ji,” jiñuma vicha tariva janadacanu variy. Yadatya munatya jiirya Jüdeni niquejada, jidyetyadodaju vasera, jiñuma carera sítenu tuchoda. ¹⁶Yabay tajijyu rajisiy vacha niquejada, jiryatimyu ne samirya ravichasara day, rajutyannuruñuma japichiy daryaju variy nicyaray vichadamuju davyuy. ¹⁷⁻¹⁸Jiryatyi riñiquera vacha niquejada, rårapuñuma varidye nutyunuma rucudivay variy. Nanuvichanuyada Imenévu, Jidétuta darya, nanujiintemya sítenujisidye. Nadani datyanu variy: “Rimiyisama Jüdeni siityarivay diiyadamusiy.” Jirya datyadodata ricyaretaniy Jüdeni siityarisadajisiryi tavay. ¹⁹Jiryatyi Jüdeni jvaarya, ravichasarate ne vanay siquityajatanichara, samiy bacharanumate jasirya, jirya niquejadata bacharate: “Vuyntyityu datya riy jiñijyanvay,” jadchintyi jirya niquejadata: “Jiryantya jiintye tajijyu jadchiy, vacha vichadajisiy, titaju rityi jtay siva: Rayntyityu dajyi, Jesús.”

²⁰Criquityi jaryi rajuuru sabarya jiryorimyu, nutyu sidye vandapay criquityera jvaachara, óruteru jvaachara jarye, jasidye ranicha jiiputera jvaachara risajuntiy, nandiimusiyy jvaachara jarye. Jasidyerya vandapay sidye, ne jaryi ruvaadyerya, tapinubesiy runutya varirya, ravimu sasaryi tavay nijyanvay, jiryatyi samirya nacho jnuchavaryi. Tara sidye jita, ne runutya jaryidyerya, titaju ribe tara bajyojura.

²¹Daryanidatye vuryityi jiya tajijyu, vacha jachipiyajada quivuyadajisiy, sabay Jüdeni jimyuchehijyu

jiryorimyu varivyuy, vuryatidye jmutyasara variñi, vanira siityevay vuryeçha varintyi, tara jvaayadaju.

²²Jivyicharutyi Jüdeni siityarinuju, yabay vaderonuvada niruyadajisiy. Titaju rityi joránu Judenunijyu jiryatyi samirya jachityavay daryaju riy, yavata risaju ranacho samirya vichasada jiryatyi Jüdeni vatate yivara, jiryatyi tara jachipiyajadajisiryi. Yasiityari jitaní, yavata jaryi variñi. ²³Yabay rajisiy riñiquettadayu, ne ridyetyadamu daryajuy. Ne yinuy jadchiy runday niqueyada day. ²⁴Nityi vichasara Jüdeni muchechiy, ne saryi nique tisa, saryi vichanichara samirya riy tavay, darya saryi datyara datyadoda samidientiy. Daryaday saryi jachiniy tijjuntiyu nityi rachaniy tara ntani. ²⁵Santya datyanutityi samiryamusiryi rityi vicha niquevye saju, mityajisitye saryi jmutyate Jüdeni riy, riryityidye paruy riva taji jachipiyajada variy, riryatidye datyara sítenu varintyi. ²⁶Ranumatyi ramiy vacha jachipiyajada ruuva, riryasipyatay variy bayantu nutyityu juredamusiy, jiryatyi tanuvunusavay rivyichasara variy, riryatidye jvaay sajura jivyatara.

Nutyura riryechasara nijyanvay tamitya rundamu

3 ¹Yadatya samirya jirya: Tamitya rundamu jita racha suvuchara. ²Daryaday riryecha nijyanvantyi, riryavata jaryiyu, daryaday riryavatara criquiy jaryi varintyi. Riryannuvacharayuy, riryajchanatyayinnuvayadamuy, riryecha javityiyeyada niquevay, ne riryasiityeruy rijyu jiyevyeda. Ne riryadatya jchanatyadani ti tarivantiy, dantyamuy ne riryatuvachuruy simu Jüdeni. ³Ne riryadatyara samirya vatada, ne riryadatyara jantyutyadantiy,

riryęcha vacha niqevantiyi, ne riryądatyara yinutyasada, riryęcha sítenu datyísamiy jíta, riryąjavittuyuy varirya samirya vichada. ⁴Riryęcha jatachuvantiyi, suvuyasamiy, ridyirya day jijechipiya rajú day, riryasiityari jítara jiryatiy rucanuy rajisiy Jüdenumu tuvachodara. ⁵Riryąjtay variy: “Ray siityariñi Jüdenu,” tama vuñi diryuy nta sumutya Jüdenu ruvaayadamuyu, tama. Yąbay tajijyu riryąjisiy darya vichavay nijyanvay. ⁶Davyeñi jíta jityenuñumaya rorivyayu, riquivüchu riy vatuvyeda datyísamiy, jaryi juuchatahavay, vacha vichadamu rityataniy yimujura. ⁷Jivye vatuy rañi jachipiya datyadara, tama riñi datyara samirya sítenu, tama. ⁸Nutyu nanuvichanuyada rimyurajube, Jálesiy jyatıbyay, Jámbrisy jyatıbyay jarye, jiryatiy nanuvichada Muiyésibe jiyaroju, daryaday jivye vaduntyi jiryatiy riquivüchuriy vatuy, rivyichasara sítenu jiyarojuntiy. Vamirya jachityavay daryaju daryi, rutañuyada variy siityevayu, tama riñicha, tii, mitya. ⁹Ne riryąjiriryıva junay jadchiñundyerya, riryanuma datya nijyanvay varidye, jiryatiy runuy datyísamiy daryaju riy, nutyu daryani nanichantiy, nutyu Jálesibejyuy vichada daryantiy.

**Supajada Pávurubay tamitya
tara simu Timutévubay**

¹⁰Ji jíta siityarijida radyetyadoda-muntirye, daryatiy ravychadadate samiryamu ray, daryatiy rivaachara rajechipiyaadate, rachiityejada daryaju Jüdenuju. Jidyiyada riva ravychada tapimusintiy, ravyatada jarye. ¹¹Daryaday jidyiyada rivantiy jiryatiy riyasanta javatyadata ray, Jüdenu siityarişadiva, jiryatiy ravychada paruchariy ramusintiyi, jiryatiy rivyichadadate Antiyuquıyamu ray, Icóniyumu,

Dísturamu jarye, nutyuñita ravychada paruchariy tıtaju tara javatyadatacu. Vuryindenu jíta sipyatada ramusiy tıtaju ray.

¹²Rani sítenu tıtajuta: Rityi siityariñi Jüdenu, Crıstu Jesús jmutyadata, riryechate javatyasavatye riva. ¹³Vamiryamu vichavay jíta, jatachodacanumiy jarye, jaryinravaju riryajvaay variy, riryaquivüchu riy tavay, daryaday riryęcha quivüchusavay varintidyey. ¹⁴Rıtay yıva, ji jíta raşitaryi sítenu jiryatiy jidyetya samityera, jityuvachu variy jijechitya ramu. Ne jiñi datyísatecu: “Chıra datyanu ray.” ¹⁵Deramusidyete jidyetyadatera Jüdenu niquejadate, rani radatyanute vuy nutyuramusiy saray Crıstu Jesús vuryeyada, nutyuramusiy, vudyetyatera simu tuvachoda ramusiy. ¹⁶Jüdenu niquejada jíta, tıtaju jiryatiy riñuyada vaduy cateravara, sasayada Jüdenu Yintutára. Rani jíta samirya datyadodaju riy, rityimyu ne datyara, samirya day niqetyadajuntiryi jiryatiy ripyaruyada riva Jüdenu siityarişada, daryaday samirya jmutyadajuntiryi rityi caray rajisiy tajijyu, taryatadedajuntiryi, Jüdenu siityarişadaju. Darya samirya rajuntirya vuryatidye niqetta riy jiryatimyu ne rityuvachuruy Jüdenu niquejadamu. ¹⁷Jirya Jüdenu niquejada sajavyetya, nitiy siityariñi Jüdenu day, şanuma jdutya jityajuyuy, tıtaju samirya jvaayadaju tara.

4 ¹Rajtay tara yıva, yatuvachu samiy ranacho, Jüdenu jnyu daryaju vuñeçho, Crıstu Jesús jarye, nitiy raçha cadnadu jnyvyejyu, diivyejyu jarye; yatuvachu samiy ranacho, jiñuma jada şanumatiy mutı Jesús varintiyi, sítenu sansuyadaju. ²Ramu rıtay yıva, yatuvachu rimu day: “Yadatyanu samityera Jüdenu niquejadate. Yadatyanujayasarára, ne yajachipiya: ‘¿Samiryavidye diyera datyadoda?’” Yadatyanu riy jiryatiy

ricyarantiy, yaniquetya riy jiryatimyu ne ruvaay samiy, yavanutyaniy rayaroju riy, ne yinuy ripyaruryuñuma riva Judenu siityarisada day. Yajvaay títajura jiñuma paruy riva tapi vichada, daryamusidyeyadatanuntiy. ³Raday jutí jítararundantiy dañita riyatuvachuruchara nijyanvay variy samirya datyadodanachonundyey; tapitya riyavata rajuu datyanuvañecho rityi radatyanu variy tarata riy, ratiy rityuvachurudyey. ⁴Riryaparuy tuvachoda riva sitenu niquejada, riryasiitye jíta ranachojitajiniquejada varidyey. ⁵Ji Timutévu, yantya jnutyasamiy ji, yajachiniy rajujipyarutyada ji, yantya datyanu samirya samituchoda, yajtotaniy títaju yivaayadatarata.

⁶Rajyu jíta, ritonuma rayada rundate, riryumiryuñumara rayndajajamituchoda jiyadaju.

⁷Rivaamyaj samirya Judenu jtedamuju, ritotanimyara rañujinuyadata, rachiityemaj sitenu sajurudenu, ne rachutyeniryurya. ⁸Diye jítasabay rajijura samirya vichadamurichirya, ratiy sasañuvij Vuryindenu ray, variryundamutiy sajti. Ninijíta sitenu datya samiy, ne saçarera. Ne vinu ray rajmutyara Vuryindenu murichedoda day, títaju rityi nuturya sitijadarunda, jaryi rivyata daryajuni.

Jaticheyada

⁹Yantya jniy vanira rimuju.

¹⁰Sarrachumaj Démasiy vaderonu ray, sayada Tesadónicamuj rajisij, savatada daryajura jaryi taratí vichada; vaderonu Cresente jiyada Cadásiyamuju, Títu jarye jiyada Darumásiyamujuntidyey. ¹¹Vinu Dúcasij machosara risaj. Yejiryitya rumusiñi Márcu, yapuchij jiyujuni, satidyey jmutya variy jiyu ray, jiryatij siityera daryajuni. ¹²Ripatiñi Tiquicu

Evésumuju. ¹³Yanumatij jnintiy, yajtu rumusirya sudorajisij raryetya, raryejejiryatij ratyocheda Trúvasimiyura, Cárpu rorimiyu. Yajtura catera padye nuchara risaju, dantyamuy ne yajachipurya racyateravij rañuyadajuntiy.

¹⁴Adejántru jíta, jiryatij yivamyutera jvaañuni, ninijarupanu jaryiryey. Vuyntyityu ramurichenutaniy sarupadodivayuy. ¹⁵Ji jarye rajnutyasajisij ji, sarupadodajisij, saniquettayinurya vudyetyadoda.

¹⁶Jiryatij rajottya rañiquetij vijyomujache satuunu cadnadu, ne tijtirutyí rayadaju niquejasij varidyey, tii, mitya, títajuni rijetyachiyaj varidyeryey. Ne rañiruy tij rajiyasatyanij variy riva nundyeryi. ¹⁷Vuryindenu jíta vichanuyadaratyuuu, savanutyada variryey, ratidyey tuchunumayara samituchoda, títajunijyanvay tuvachodaju. Nutyu ninidaj rañijantyuyada tonibí jtosij rivantiy, ne riñi bayajada rañijyu darya. ¹⁸Vuryindenu rajnutyasarate nicyaraj vichadajisiryey. Saray rayada ratidyey jay variy ravimuvavichajo, jadchityi sanusuchara. Niday rachajayasara vandamuntiy. Daryanumaracha jasiy.

Muchuvedata satuchu sisa Judenu riyadaju

¹⁹Yamuchuvañi Prísidyay, savanu Aquída jaryey, jivye Onesijuru tenuveda jaryey. ²⁰Erástu machojada Coríntyumu, ratyochedanij Trójimu Myidétumu, jdivajni daryajuni. ²¹Yantya jniy vanira, nijyajisij. Rupa jíta yimura muchuveda Evúbudu, Pudénte, Dínu, Cudávuryajuy jaryey, títaju jiryatij Crístu Jesúsmsusij vutyeryiveda riy. ²²Jasidyey sachasara Vuryindenu Jesucristu yisaj, Timutévu. Sajmutya Judenu jiryey títaju. Rabaryimaj jasiy.

Sayanuma
Pávuru